



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym

TAPAK 8

Tir Murmu-i temang shilem tenlaba awareness agütsütsü ajungshir

Mitoma Asian Cup nung asayatsü masayatsü mejangja



VOL. XXI NO. 78 (ADOK 78)

DIMAPUR

ROGONÜ (FRIDAY)

LUCHII (DECEMBER) 29, 2023

₹ 5.00



Pei sobaliba tajung meindoki Christmas amungba noksa ka yangi angur. Ibai Longleng district kübok Yangching yimtak ariju kolak nung nung Christmas petinu aser kima Christmas noksa ka yur Yisu asoba benjungmung amungba angur. Iba yim ya Phom lima anüdoklen Phom yim tesü sabuba lir. Iba yim serbo Konyak limai ayaoktsü. Iba yimtak 1952 kum Mongsenyimti arogo nung amungba purtem kar oagi arogo tentetsü. International Trade Centre Pangsha leni aoba highway iba yimtsung ajanga aoe. Iba noksa ya December 20, 2023 anogo nung par yimtak tenla ki tasen meshitetba anogo nung agiba lir. (Photo: Sentila Longkumer)

COVID-19 active cases 4,097 lir

New Delhi, Luchii/December 28 (Agencies): India nung Brehostibarnü COVID-19 cases 702 liasü aser tang active cases 4,097 lir ta health ministry ajanga ashir.

Iba den ano COVID-19 sub-variant JN.1 cases 157 tesem balala nung putet aser item ya timba Kerala nung liasü, kong JN.1 cases 78 liasü.

Health ministry indang Brehostibarnep data nung ashiba agi, ghonda 24 tsungta nisung trok asü - Maharashtra nung ana, Kerala, Karnataka, West Bengal aser Delhi nung kaka.

Taoba hopta December 22 nü linük nung COVID-19 cases tasen 752 puteta liasü. December 5 tashinung anogoshi iba tashidak putetba ya ajema kuma double-digits dang liasü, saka JN.1 sub variant poktetba aser tzüngsang mopung temokong asüba yong tali akumer.

Indian SARS-CoV-2 Genomics Consortium (INSACOG) nungi data ajanga ashiba agi, Kerala sülen JN.1 cases timtiba ya Gujarat lir, kong iba tashidak agi meneper nisung 34 lir.

Tesüiba hopta ishika tsungta state kar nung COVID cases timba akum. Tang tashinung state aser Union Territories toku nung JN.1 sub-variant aliba putetogo.

Itemji Kerala nung cases 78,

Gujarat nung cases 34, Goa nung cases 18, Karnataka nung cases 8, Maharashtra nung cases 7, Rajasthan nung cases 5, Tamil Nadu nung cases pezü, Telangana nung cases ana aser Delhi nung case ka alitsü.

World Health Organisation (WHO) ajanga JN.1 ya "variant of interest" balaka ta sangdongogo, kechiaser iba variant ya kanga kera prokshia aor. Ajisüaka 'global public health risk' ajema lir, ta WHO-i ashir.

Taoba mapang JN.1 sub variant ya BA.2.86 sub-lineages nung shilem ka ama variant of interest (VOI) ta nungja agüja liasü.

Centre-i states aser Union Territories ajanga dang COVID-19 aser JN.1 sub-variant asoshi saksalema aser kumdanga alitsü shia lir.

Delhi Health Minister Saurabh Bharadwaj-ia JN.1 sub-variant aliba jangjatsü asoshi COVID positive cases alitem dak genome sequencing agitsü nenshia ashir.

Brehostibarnü Bharadwaj-i Lok Nayak Jai Prakash (LNJP) hospital semdanga COVID-19 cases anepalutsü asoshi renema aliba asadanga liasü. Iba mozüki nung nungdabapur yaritsü renema lir ta pai ashir.

Delhi nung COVID-19 sub-variant JN.1 cases mezüngbuba Bodhbarnü puteta liasü.

INDIA alliance-i menden ajak nungi tokteptsü: Mamata

Chakla, Luchii/December 28 (Agencies): West Bengal chief minister aser Trinamool Congress tetsüti Mamata Banerjee-i ashiba agi, 2024 Lok Sabha election mapang INDIA alliance-i constituency ajak nungi tokteptsü.

"Agenda mali, lenir mali, aser tasa mali...INDIA alliance-i linük ajungalen menden ajak nung tokteptsü," ta Mamata-i Brehostibarnü rally ka nung ashir.

West Bengal nung North 24 Parganas district kübok Chakla tesem nung nüburtem senden ka nung jembidang, West Bengal CM-i makamaiter ajunga nemjang seret pongu-ngu agütsüo, koba BJP-i election nübuyim mapang sangdonga arur, ta lai ashir.

"Election mapang BJP-i jang seret pongu-ngu agütsütsü ta sangdong, saka onoki tetenzük nungi agüja arur..." ta lai ashir.

BJP-i aniba central sorkari West Bengal nem senotsü agütsüba anenogo, saka anogo 45 asoshi MGNRGA scheme

agütsür, ta Mamata Banerjee-i ashi.

"Central sorkari state nem senotsü agütsüba ajak anenogo. Anogo 100 inyaker asoshia parnokki sen magütsü. State sorkar ketdangsuba kübok onoki anogo 45 asoshi yimya balala nung inyakdaksür, aser ibaji ajanga nüburtem pei asoshi ayanger," ta lai ashir.

Iba sülen West Bengal chief minister-i maneni 2021 kum nungi lar sorkari nübur ajangzüksü asoshi scheme balala yanglua mapa kuma inyakba indang jembia liasü.

"2021 nung onoki sorkar tentetba sülen onoki ration, Swastha Sathi card, Laxmir Bhandar tem nangzükba ama angati agüja arur. Nangzükba ama onoki kaketshir nem smart cards agütsü tenzükogo. Kaketshir ajak Class 9 nung lia Sabuj Sathi cycle agütsür aser Class 12 nung smart phone ka-ka agütsür," ta West Bengal CM Mamata Banerjee-i ashi.

"Tamangba yimsü mesüra

kin-kidong mebendangi kibong makum aliba makamait tetsür nem sen 25000 agütsür. Kanyashree scheme kübok arishi kum 18 tashi azüngba sülen tetsür kaketshirtem kibong mekumra parnok indang bank accounts nung sen 25000 inoktsür. Tanü tetsürtem shisabulu mali. Parnok asen lokti asoshi tejak tentetertem lir. Tetsürtem class 12 nung aser college mesüra university nung lia scholarship agütsür," ta lai ashir.

Mamata-i TMC workers tem dang nüburtem dangi aotsü, parnok den meyokteptsü aser nübur ajangzüksü atema mapa tembanga inyaktsü ayongzükka liasü. Party mapa ya pei tenzüksü asoshi masü saka nübur tenzüksü asoshi lir, ta lai ashir.

Kasa mapang BJP-i aniba NDA ya 2024 Lok Sabha elections nung takok ngua centre nung kümsük tasembuba sorkar tentetsü nükjidong lir.

RIMS Imphal nung doctor tem longkak ait

Imphal, Luchii/December 28 (TYO): Doctor ka dak züka merenshiba mechi Regional Institute of Medical Sciences, Imphal nung aliba doctor tem aser medical students tem Brehostibarnü mener longkak aitba ajanga shirangertem kanga timtema liasü.

Parnok ya RIMS nung Outpatient Department jakdang longkak aita amen.

Brehostibarnü office mapang doctor temi longkak aitba mechi OPD shibanga liasü.

Iba longkak aitba sentong ya Teachers and Medical Officers' Association ajanga ayongzükka liasü.

RIMS nung doctor aser kaketshir temi longkak aitdang "Doctor tem ya shiranger aser lokti asoshi lir," "Doctor tem tesunep nung inyakdakjang," "Doctor tem kumzükang," aser "Doctor tem akumtsüboang," ta placard zülua bener longkak aita liasü.

Iba RIMS mozüki nungi doctor ka dak Imphal nungi

kilometre tenet shi pilar Luwangsangbam tesem nung par kidang mejangjaba nisungtemi December 24, 2023 nü kanga sashia züka merenshi aser iba sülen longkak aitba sentong ya ayongzük, ta doctor kati ashir.

RIMS nungi doctor temi iba ama mapa tamajung inyakba aija liasü.

Iba timtem atalokba dak sendakba nung ken o ka benoka lir aser doctor dak züka merenshirtem aputsü meranger, ta police-i ashir.

New Year mapang aibelener azüoktsü sepai 10,000 tali yoktsü

New Delhi, Luchii/December 28 (Agencies): New Year benjongmung mechi Delhi Police-i yimti ajungalen security tajungba achayangtsü tenzükogo aser lanur telok balalai timtem agütsüba aser traffic aibelener azüoktsü mechi sepai 10,000 talila yoksemsü lir, ta police tanishir kati Brehostibarnü ashir.

Police tem shifts ana lemsar inyaktsü aser SHOs ajanga dang temzüng-özüng amshitsü asoshi lenmang nung alitsü totuyuba agütsüo.

"Sepaitem yoktsü asoshi mapang ana lemsa lir. Mezüngbuba ya nikongdang 5:00 ako nungi ayatirm (12:00 ako) tashi alitsü aser ka ayatirm nungi anepdang 6:00 ako tashi alitsü," ta Deputy Commissioner of Police (northeast) Joy Tirkey-i ashir.

New Year mapang 'stunt-

biking' aser lanur telok-teloki timtem balala agütsüba nungi nokdangtsü asoshi police temi security arrangements tajungba yanglua lir.

December 31 nü traffic aser Delhi Police indang unit balala nungi police 10,000 dak tema yoka yimti anüksü, ta ano police tanishi kati ashir.

Delhi Traffic Police ajanga gari tiptema senzütetsü atema police 2,500 shi yoktsü aser team 250-i yi jemer gari aniba meittsü, ta ketdangsurtemi Brehostibarnü ashir.

Connaught Place leni aoba garitem Deobar nikongdang 8:00 ako sülen nokdangtsü, ta Special Commissioner of Police (Traffic) SS Yadav-i ashir.

Nisung aika adenshitsu/senzütsü imla aliba tesemtem nung police peria yoktsü, ta ashir. "Tesem balala nung

motorcycles 450 shi renema alitsü," ta Special Commissioner-i ashir.

Nisung kanga longsoa aliba market area nunga sepai tali yoksema lir, ta ano police tanishir kati ashir.

"New Year mapang nüburtem kumzükka ayutsü, telok balala adenshir dangar nem timtem agütsüba mezüra traffic özüng nung aibelener nokdangtsü mechi onoki tesem 500 dak tema jangjateta lir. Lemjem tulu 287 aser drunken points (vulnerable points) 233 nung special checking teams yoka traffic özüng nung aibelenermerenshitsu," ta ashir.

Police temi nüburtem dang New Year mapang chia-jemer gari manishitsu ajungshi aser traffic signals repringa gari kera manishitsu ajungshia liasü.

57 buba JSU annual conference agiogo



Tongti tesemdanger MLA Kevipodi Sophie aser alakteta jaoker Col. Gaurav Singh na den tanga lenirtem tangokba noksa nung angur.

Dimapur, Luchii/December 28 (TYO): 57buba nung Jakhama Students' Union(JSU) December 28 nü Campion School Ground, Jakhama yimtsüung nung agiogo. Iba sentong ya "Go Green to Breathe Clean" omen nung ajemdaker agia liasü.

Sentong nung MLA, Southern Angami-1 MLA Kevipodi Sophie tongti tesemdanger aser Colonel Gaurav Singh SC, SM Commanding Officer-164 Naga Regt alakteta jaoker liasü.

Jakhama Students' Union Education Trust Convenor Kezhokhoto Savi-i, Education Trust rongsenketzung jenjang metetdaksü aser sensaker kibong nungi kaketshirtemi koda senotsü teyari agitettsü iba indang metetdaksü. Savi-isa, best Matriculate (HLSC) atema asür Khuzo Zhotso Award indang metetdakja liasü.

Tongti tejaoker Kevipodi

Sophie-i o jembiba mapang, kaketshir ka taküm nung mapang amshitsü koda tongtibang iba indang lemsatep aser ashiba agi, nai mapang memenepra mapangi na matatsü. Paisa, tanü kanga dang kara aoba technology lima ka nung temaba jenjang tongtettsü atema kaketshirtemi meranga inyaksüla ta ashi.

Paisa, bendanga agüja minyakba kaketshirtem asoshi kecha lenmang mali, kechiyong tetoktepba kaga sashia kümogo ta ashiba den backdoor appointment dak tamang maktsü asoshi ayongzük, kechiyong state sorkari mapa tazüing maliba nung nisungtem aniokba nokdangtsü atema jenjang tapet agiogo, ta shisem. Kakets shisatsü ya entrepreneur ka aser shishilembar ka akümtsü atema-a kanga tongtibang lir, ta pai ashi.

Kasa mapang nung alakteta

jaoker Colonel Gaurav Singh-i, lokti asoshi mapang tajung inyaksü atema lanurtem dak tashi lir aser lanurtemi koda tongtibang shilem agitsü nüngdaker iba indang lemsatep. Paisa, takok angutsü atema meranga inyaksüba dak alaker tanga lenmang kecha mali ta shia kaketshirtem ajungshi aser ajak ajangzüksü atema lokti longjemer inyaksü ayongzükba den "Go Green to Breathe Clean" omen dak ajemdaker tzi mopung wazüka ayutsü asoshi kaketshirtemi jenjang agiba atema kanga pelaba lemsatepa liasü.

Maneni sentong nung Jakhama Gazetted Officer Krotho(JGOK) tir-i, merekmejua alitsü koda tongtibang iba indang lemsatep. Parnoki Khel/ Colony temerektiba nem naroküm agütsütsü asoshi tetoktepba ka ayongzük aser khel ti aser colony pezü nungi iba tetoktepba ya Sophietso Khel-i koka liasü.

Iba sentong ya Shieku Sophie lenisüba nung agi, Pastor JCRC John Zao-i Tsüingrem temaotsü meshizüka sarasadem, JSU tir Keviseto Tase-i lokti pela agizükba o jembiba, JSU tongti züluri osang agütsü, Lolevinu Zhotso-i ken ka aten, takok tajung angurtem nem tetushi agütsü aser Kulvi Zhotso-i tepela o jembiba sülen lokti chiyongba mapang liasü.

Mezüngbuba sentong nung Jakhama Village Council, yimtsü yimbotem, GB, Ex-MLA Medokul Sophie, SAPO tir, SASU tir aser par telok, tetsür lokti tentet aser gazetted officer temi shilem agia liasü.

Green Bodoland Mission atema bangzüng agizükogo

Guwahati, Luchii/December 28 (Agencies): Bodoland Territorial Council Legislative Assembly nung Brehostibarnü ajaki mulunga Green Bodoland Mission aser Child Friendly & Child Labour Free Bodoland atema bangzüng agizükogo.

Bodoland Territorial Council Legislative Assembly winter session nung bangzüng anaprongla agizükba mapang BTC tekolakba Pramod Boro-i, alima tzi mopung meraksatsütsü atema terenlok maparen ajak iba tangatetba den peta inyaksangshitsü nüngdakba lemsatep.

Green Bodoland Mission kübok BTR kübok ali hectar 2000 nung süngtong atemtsüba densema lir, aser iba sentong kübok küm ana tsüingda süngtong crore 1 shi atemtsü.

Maneni khen dang amshiba plastic juli amshiba nokdangtsü aser tarutsü tajungba ka asoshi ali telung nung tzi wazüka ayutsü atema sentong yangludat.

House-i, Green Bodoland Mission atema SOPD Budget 2023-24 shilem ana lemezüksüogö.

BTR sorkari BTR nung tanurtem mapa inyaksatsüba, tanür asüdang kibong kümdaktsüba aser child exploitation aser child trafficking nokdangtsü atema takokba tashi jenjang agitsü bangjemogö.

BTR sorkarisa, tanurtem temeden kümzüka ayutsü atema budget shilem ka wazüka ayutsü atema telemtetba agiogo.

Item fund tem ya tanurtem temeden kümzüka ayutsü aser tajungba kümdaktsütsü asoshi lir.

Kasa mapang nung House-i, Bodoland Territorial Region (BTR) nung venture degree colleges 10 nung teaching aser non-teaching staff 259 provincialized sütsüba metetaksüogö.

College tem rongnung Tamulpur College, Tamulpur;

Dimakuchi College, Dimakuchi, Udalguri; Mushalpur College, Mushalpur, Baksa; Tamulpur Degree College, Barkhopa, Tamulpur; Gurudev Kalicharan Brahma College, Tipkai, Kokrajhar; Borobazar College, Borobazar, Chirang; Bhergaon College, Bhergaon, Udalguri; Zamduar College, Zamduar, Kokrajhar; Koklabari Chapaguri College, Hazuwa, Baksa aser Runikhata College, Runikhata, Chirang densema lir.

College den külemi assistant professor 79, tutor 65, administration staff 108 aser office staff 7 tutor ama provincialize sütsütsü.

Maneni elementary tesayur 1216 shimtsü asoshi education department-i advertisements yakta sangdongtsü, ta kasa sangdong ajanga metetdaksü. Iba ajanga sorkar aser provincialized elementary school tem nung tesayur agi kanga anüingba tebilemstü bentettsütsü.

OFFICE OF THE
CHUCHUYIMLANG KAKETSHIR TELONGJEM DIMAPUR

METETDAKTSÜR

Chuchuyimlang Kaketshir Telongjem Dimapur (CKTD) 47 buba Küm Tatem Lokti Senden Sentong **December 29, 2023 anepdang 10:00 ako** nungi tenzüka CKTD kimen Wb. Nukshitemjen Pongen kidang Landmark Colony, Dimapur nung agitsü. Anungji CKTD züingsem ajak medema arua adentsü metetdaksür."

**Sd/-
Imliakum
Tir, CKTD**

**Sd/-
Temjenkala Longkumer
Tongti Zülur, CKTD**

Winter session Jan 05 nü tenzüksü

Agartala, Luchii/December 28 (Agencies): Tripura Legislative Assembly winter session January 5 nü tenzüksü, ta Parliamentary Affairs Minister Ratan Lal Nath-i metetdaksü.

Winter session ya anogo pongu agitsü aser January 11 nü tembangtsü. Iba telemtetba ya Brehostibarnü Business Advisory Committee (BAC) senden nung agizüka liasü.

BAC senden nung Nath-i, taoba minister aser MLA Surajit Datta asüba osang angazüka mang ayimba lemsatepba den asükhü lemsatepa liasü.

Yimya agi English year tenzükba shia mezüngbuba legislative session nung Angh-i o jembiba tenzükur.

Yamaji Angh Indrasena

Reddy Nallu-i January 5 nü mezüngbuba session nung o jembitsü atema renema lir.

Ken o sensaksemstü aika mali asünung house ya anogo asem sülenbo shibangtsü akok, saka Angh indang speech sensaksemstü atema züingsemtem nem mapang peria agütsütsü aser tanga onük tema kanga junga sensak asemstü asoshi anogo pongu amentsü atema telemtetba agia liasü, ta Nath-i ashi.

Maneni Nath-isa, Winter session mapang Tripura sorkari bill ana benoktsü asoshi sentong aliba lemsatepogö. Bill ana ya Tripura State Rifle Fourth Amendment Bill aser Tripura State Goods and Services Tax Seventh Amendment Bill asütsü.

Gas pipeline apok; nisung 3 yiru

Guwahati, Luchii/December 28 (Agencies): Brehostibarnü Guwahati yimti kübok Chandrapur tesem nung Magazine VIP Road nung gas pipeline ka apokba sülen tetsür ka densema nisung asem tashi yirua liasü.

Purba Bharati-i iba pipeline tendangba mapang iba lendong ya ataloka liasü. Purba Bharati company yagi pipeline mesangba achaayanga arudar.

Lendong nung yirurtem ya Raju Kalita, Debjit Sharma aser Reena Tide ta jangjaogö.

Parnok asemprongla ya temang anepalutsü atema Guwahati Medical College and Hospital-i aritepa anir oa liasü.

Pipeline kanga sashia apokba ajanga iba temeket nung aliba garitem aser auto rikshaw-tem raksaja liasü.

Osang ajanga ashiba agi, tzi amshia leak test ka asüba mapang ajungbena gas pipeline ya poka liasü.

Lendong atalokli Noonmati nungi police tem iba tesemi aritepa ao aser tensa azüoka liasü.

Manipur cabinet-i IDP tem nem senotsü teyari agütsütsü agizük

Imphal, Luchii/December 28 (Agencies): Chief Minister N Biren Singh lenisüba nung Manipur cabinet-i Brehostibarnü Internationally Displaced Persons (IDPs) tem nem senotsü teyari aser tajangzük agütsütsü atema agizükogö.

Iba senden ya Chief Minister indang secretariat nung mena liasü. "Rajya Sabha MP, Leishemba Sanajaoba densema tanü cabinet nung külem tenzükertem den kü indang official kidang senden ka menogö," ta Chief Minister N Biren-i X sabang nung tweet asü.

"Senden nung Internationally Displaced Persons tem ajangzükdaksütsü aser state nung yimjung adokdakja akhi ama tensa tajungba kümdaktsütsü asoshi sensaksemogö," ta CM-isa shisem.

State nung kin o kin tsüingda mangatetep adokba mapang shirnoksa kiojen aser osettsüt raksa rongtokogö parnok nem sen lakh kaka agütsütsü ta Chief Minister-i sangdongba sülen tang IDP tem nem senotsü teyari agütsütsü atema cabinet-i telemtetba agiogo.

Manipur nung tang Meitie aser Kuki nunger tsüingda mangatetep adoker aliba ajanga nisung 61,000 dak tema pei talidak ki toktsür jenshiogö. Parnok ya state kübok tesem balala nung amenoka aliba relief camps 350 shi nung jenoka lir.

May 3 nü nungi mangatetep tenzükba sülen tang tashi nung ki 4,786 dak tema rongtokogö aser temple aser tenlaki densema tamangba yimsü dak sendakba kiojen 386 raksatsüogö.

IDP tem ya tang state kübok relief camps 350 shi nung jenoka lir.

Tir Murmu-i temang shilem tenlaba awareness agütsütsü ajungshir



New Delhi, Luchii/ December 28 (Agencies): New Delhi nung Institute of Liver and Biliary Sciences (ILBS) pur 9buba Convocation sentong nung jembidang linük Tir, Droupadi Murmu-i, linük nung nüburtem nem temang shilem tenla agütsütsü atema awareness agütsütsü nüngdak, ta metetdaksü.

Laisa, shirangertem aika temesen aser tezüngjang densema temang shilem tenlar manguba agi kanga timtemer, anungji temang shilem tenlaba ya nüburtem nem jungjunga angatetdaksütsü atema awareness sentong maneni ayongzüka agitsü nüngdak, ta ashi.

Laisa, "Temesen ya asen temang atema security guard lir ta jembir. Temesen dak sendakba ajanga timtem balala adokba ya asen linük nung

kanga bulua ataloker, aser ibaji ajanga tashidak balala adokdaksüba ya shisabulutsüsa lir," ta ashi.

Laisa, temesen dak sendakba tashidak balala nokdangtsü atema ILBS-i shilem tulu agitsü imlar, ta ashi. Temang shilem tenla agütsürtem ajemba ajanga shirangertem aikati temesen, tezüngjang mesüra tanga temang shilem transplant asütsü atema mangur, ta lai ashi.

"Tia maka, temang shilen tenlaba dak sendakba nung tim mesüi inyakba osang mapang shia angashir. Item tebilemsü koktettsü atema inyaksüji rajema aliba lokti ka mapa. Asen linük nung temang shilem tenlaba indang awareness campaign aika agitsü nüngdak," ta lai ashi.

Lai doctor tem danga pei

temang jungjunga anepalutsü mepishi.

Doctor temi ghonda talanglang mapa inyaker, emergency case aser night duty nung shirangertem yaritsüsa akümer, ta lai ashi.

"Anungji tayongzükba jenti liaka mapang ajak nung doctor tem temang aser tanela anema alitsü aser yakyaka alitsüji kanga tongtibang," ta lai ashi.

Küm 13 tsüngda ILBS ya kanga nüngtugu reju ka kümogo, aser item ama reju aika aliba ajanga India ya international healthcare tiyongtsü ka kumdar, ta lai ashi. ILBS nung temesen transplant 1,000 dak tema agiba aser renal transplant 300 shi agiba osang angashia pelar, ta lai ashi.

Laisa ILBS dang maneni treatment agütsüba den külemi research agitsü ajungshi.

Israel-i India nung aliba sensotem dang kümdangtsü metetdaksü

Jerusalem, December 28 (Agencies): Mongolbar nukungdang New Delhi nung aliba Israeli Embassy anasa bomb ka apokba sülen Israeli National Security Council-i India nung aliba par sensotem dang tekümdangtsü osang kar metetdaksügo.

Mongolbar nukungdang Chanakyapuri diplomatic enclave nung bomb ka apok saka shinga masü mesüra meyrü.

Israeli National Security Council-i India nung aliba Israel nungertem dang lokti aliba tesemtemi maotsü, anüolen alirtem aser Yihuda nungertem adenshiba tesemtemi maotsü, restaurants, hotels, aser pubs-i maotsü metetdaksü.

Israeli National Security Council-isa Israel nungertem maitsütem yimjak nung mesayatsü, lokti tulu adenshiba sentongtemi maotsü aser social media nung sentong balala mesangdongtsü metetdaksü.

Mongolbar nukungdang Israel Embassy anasa bomb apokba sülen Delhi Police

Special Cell, bomb disposal squad aser fire department nungi teams iba tesem jagi ao. National Investigation Agency (NIA) team kati ghonda asem shi iba tesem nungji bushisingdanga liasü.

Iba tatalokba sülen Israel embassy densema Israel nungertem nung security akangshio.

Tamalen National Security Council-i Israel nungertem dang alima tesem ajaklen Yihuda nungertem sempaba kanga bulua kümdar, anungji Israel nungertem bendangleni maotsüla, ta tekümdangtsü osang ka metetdaksü.

2021 küm nunga New Delhi nung Israeli Embassy amakdang gari aika raksa aser 2012 küm nunga Israeli Embassy amakdang Israeli security staff züngsem ka kinüngtsü yirua liasü.

Israel sepaitem aser Hamas kiralongrar na tsüngda rara tenzükba sülen New Delhi nung aliba Israel Embassy nung security akhangshia liasü.

Narendra Modi-i Ayodhya semdangtsü



New Delhi, Luchii/ December 28 (Agencies): Ato Kilonser Narendra Modi-i December 30 nü Ayodhya semdangtsü aser Ayodhya Airport aser Ayodhya Dham Junction Railway Station densema sen crore 11,100 alang project tem lapoktsütsü.

Ato Kilonser-isa Amrit Bharat train tasen ana aser Vande Bharat train tasen trok tenzüktsütsü. Ram Temple lapoktsü hopta ishika lia PM Modi-i iba yimti nung lenmang tasen pezü lapoktsütsü.

Modi-isa, Ayodhya nung greenfield township atema nüngshilong azüngtsütsü.

Sorkar sangdong ka ajanga ashiba agi, pai railway station ya 11:15 ako nung lapoktsütsü aser Amrit Bharat train aser Vande Bharat train tasentem tenzüktsütsü.

PM Modi-i, tawa yangluba Ayodhya Airport ya 12:15 nung lapoktsütsü aser 1:00 ako meta lokti senden ka nung shilem

agitsü, kong pai state nung sen crore 15,700 alang project balala tenzüktsüba den item project tem linük nem bendanga agütsütsü aser nüngshilong azüngtsütsü.

Project tem rongnung Ayodhya aser temeket nung aliba tesemtem atema sen crore 11100 alang project tem aser UP nung tanga yimtem atema sen crore 4600 alang project tem densema lir.

Osang ajanga ashiba agi, Ayodhya airport phase I ya sen crore 1450 intoka yangluogo. 6500 square meters terminal building yagi küm nung passenger lakh 10 achaayangtetsü.

Kasa mapang nung Ayodhya Railway Station ya sen crore 240 intoka yanglushiogo. Iba station ya tangbo three storey station ka kümogo, kong lifts, escalators, food plazas, cloak rooms, child care rooms, waiting halls amala modern features tem densema lir.

Centre-i UAPA kübok 'Muslim League Jammu Kashmir' nokdang



New Delhi, December 28 (Agencies): Separatist organisation 'Muslim League Jammu Kashmir' ya Unlawful Activities (Prevention) Act (UAPA) kübok ozüng alema tentetba association ka ta sangdonger, ta Bodhbarnü Union Home Minister, Amit Shah-i metetdaksü.

"All India Hurriyat Conference nung interim chairman, Masarat Alam-i

Jammu & Kashmir nung linük anema inyaker, kiralongra mapatem pusemer aser Jammu & Kashmir nung Islamic yimsüsüba benoktsü atema nisungtem ajungshir," ta Home Minister-i X ajanga metetdaksü.

Masarat Alam-i aniba 'Muslim League Jammu Kashmir (Masarat Alam faction)/MLJK-MA ya UAPA kübok ozüng alema tentetba

Association ka ta sangdonger, ta pai metetdaksü.

"Iba organization aser züngsemtemi Jammu & Kashmir nung linük anema inyakba nung shilem agir aser kiralongrar mapatem pusemer aser Islamic yimsüsüba benoktsü atema nisungtem ajungshir," ta pai X ajangasa metetdaksü.

Amit Shah-isa, "India telongjem aser sorkar anema inyaker shinga danga tai matoktsü aser ozüng kübok temerenshi tulu angutsü, ta PM @narendramodi sorkari ola tulu agi jangjajanga sangdonger," ta metetdaksü.

Muslim League Jammu Kashmir-Masarat Alam faction (MLJK-MA) ya Separatist organisation ka lir aser tang iba telok nung tongti lenirji Masarat Alam lir.

Masarat ya Hurriyat Conference nunga chairman lir. Pa küm 13 jungnüa tepuokdak liasü.

2010 küm Masarat Alam-i longkak aitsü calendar adokba sülen Jammu and Kashmir Public Safety Act (PSA) kübok pa pua liasü.



TIR YIMYIM YIMOBILEM (EDITORIAL)

DIMAPUR ROGONÜ, DECEMBER (LUCHII) 29, 2023

Ajak alu ayimtsü ayongzüker

Alima nung shinga kazüa mamonger saka ajak pei pei akok aser pei pei jangraba mapa inyaker. Item mapatemji zünger mezüngma, kari meinyaktetba kari inyaker aser kari meinyaktetba tangari kari inyaktsür ta mapa shia nisung balalai inyakba ajanga alima nung nisungtem nüngdak peritsür. Item mapatem rongnung tongtibangtiba mapa kaji aluyimba mapa ya lir, kechiyong nisung ajak alu nung züsentetba chiyongtsütem agidang taküm alitsü. Atangji, alu ya tapu ka dangbo masü saka nisungtemi achiba chiyongtsü shi aser ango, tsük, jenjang menjang, manü aser bonglashi, mapu menti, züngi mersü aser süngjang aser süngdong tapu balala zünger mezüngma koba nungisa nisungtem nüngdak angur, item ajakji asenoki ayimtsüba alutem lir. Item alutem rongnung asen ali dak apet, asenok nüngdak yari aser aseni jangraba lu kari alu tapu ka aser ano karia alu tapu ka ta ayimba ajanga tanü alima nung taküm alir nüngdak ajak perir. Aji oda, asenokia alu ka mesüra kabosa yimtettsü, anungji government mapa inyakertema aser mapa nungi anener alirtema aser ano business tapu balala inyakertema alu tapu kabosa ayim tenzüksüba mapangji tang ya lir. Tangbo asenok teimbakati kecha lua mayimer, ajisüaka alu ayimertem dang chiyongtsü ngua taküm alitsüsa mapang ka arutsüa shingaia meteta maka, anungji asenoka alu ka mesüra kabosa yima taküm alitsübaji kanga tongtibang kumogo. Kasaji kin ka asoshi pei linük nung pei nübortemi aluyimba nungi züsentetba ajanga chiyongtsü nung tangar kintem dak memetaloki alitsübaji kanga tenügdaktsü mapa ka lir. Ibayongji, tanü India nung center government-i state ajak nung district shia alu tapu kabosa ayimtsü atema sentong agüja lir. Iba sentong kübok Nagaland nunga district shia alu tapu kaka ayimtsü asoshi shimteta lir. Atangji, district ka nung alu tapu ka dang ayimtsü ta asüba government sentong jagi tanga lu ayimtsü menokdang, saka government-i shimteta lu ayimertem nemjibo government-i teyari agüja yimdaktsütsü aser iba lu nung züsentetba ayoktsübajia government khuret asütsü. Item sentongtemji Agriculture aser Allied department-tem ajanga nübortem nem pei tetsü oshi agi angatetdakja jaja nung junger. Tanü asüngbo akhidang ama masü sen agizüka achitsü tebilemba nung taila lu ayimtsü makoker aser ano alu mayim ser sen agizüka magitettsü. Ibaji dang masü saka tiyazü nisung tenüng nung mapa kecha meinyaktettsü, kechiyong mapa ajak nung Aadhar number meshitsü aser iba number ajanga dang maparen ajak inyakteptsü. Tanü putu nung temelenshi tajung kaji ibaji asütsü, kechiyong iba jagi inyakertem ajak ochishir kümdaktsür. Aji oda, tanü putu nung government-i ajungshia alu yimdaktsüba inyakyimji aluyimertem rongnung peisasa nisung 15 ayongdener Self Help Group tenzüksü aser item ama Group 20 agi 'Cluster' telok ka akümtsü aser iba telok tenüng nungji government-i teyari yoktsü aser parnoki züsentetba aser yanglutetbatem ajak government-i yoktsütsü. Tetezü akhi ama aluyimer ka ana kisüngi ayimba nung government-i shilem magir saka government tebilembaji yimtsüng ka nung talir temang alu yimdaktsüner. Iba sentongji government nung aluyimba tsütsü ketdangsertemi nübortem dang angateta ashitsüla aser nübortemia aluyimtsüba nüngdak aser nükjidongji angateta alu ayimtsü jangratsüla. Ano, asenoki tanü aluyimba tsütsü temelenshi ka bener arutsü nüngdakbaji, akhi ama yimtak dang lia aluyimtsü mebilemi alu nung lia aluyimba sobaliba ka tenzüksüla. Aji oda, alu jenji asen taliba ki asütsüla aser alu lenmang nung jajadang mapang aser gari totzü nung sen meindoki anü tanük nung ayongayonga alu tulu yima alitsübaji shisa taka mapa asütsü. Tangarbo akhidang nungi aluyimbaji yamaji ayimer, iba jagi alu nung talitsü ki asüba dang 'Farm house' ta ajar saka asenokbo alu nung masü alu makadak 'farm house' yanglur. Ibaji asensasa asen külakoktsüba aser tangar mashileni aniba mapa ka asütsü.

OLEMSABANG

Ao Riju nung Ai

~ K.Temjen Jamir

Ao Senden kübok Ao Senden Literature Board kümer küm tertenet buba nung Ao Riju (Ao Academy) kümtetbaji Ao kin kakat keno renlokba nung meilongi saka maneni tejakleni aoba takok ka asütsü. Tsüngremi agütsüba Ao oshi agi atenba ken-ang tajungba aser o jembiba-ang tanganütsü taketba ta Aor asoshi dang masü saka Naga nung kin ter sanger asoshia temoatsü küma jembia aruba oshiji Ao oshi ya lir.

Aji oda, len sapoka aotsü atema nok tajung aika rongnung tajungtiba shimtet ama, Tsüngremia Naga nungertem dang nüchi lenmang sayutsü atema Rev.Dr.Clark den pa kinungtsü Mary Mead dena Ao kin dangi yoka 1878 kümba Mulungyimsen nung tetsürtem asoshi kaketriju lapoka Ao oshi zülutsü aser azüngtsü sayu tenzüksüba nungi tanü küm 145 buba nung asenoka asenoksasa tetsüng tenteta Ao Riju lapoker asütsü. Atangji, iba riju tenüng yabo Mary Mead naroküm sünütsüka lai asenok Ao kin asoshi temeim mapa tulu inyaktsüogo. Ashiko, küm 145 jakdang par mapangbo kaketriju nung tamasa zülu angazük tenzüksü dangbo pencil melen mijang aser süngtang dang amshia tenzüksü asütsüa akok. Iba nung jagi longpak tanak nung pencil temesüng agi zülua-zülua kakat nung pen agi zülutsü koka aküm aser tanübo computer nung ajener.

Iba tsüngdaji Aor putu pungo tashi nung kaketriju balala nung Dr.Clark aser Mary Mead nati anir tamalen züngteter Aor lenirtemi Ao ocep aser tazüngtsü kakat tapu balala zülua züngdaktsüba nungi tanübo Ao oshi ya Univeristy tashi nung agiyonga odagi. Item takoktemji Ao Baptist Arogo Mungdang-i Laishiba meyipzüka adokba den arogo shia nung tila tanurtem sentep nung Ao oshi agi Lai o aser ken sayua aruba den ano Ao Sendeni Literature Board kümteta Ao oshi tebentetba, tajungba aser terenlokba nung aotsü atema kanga temulung agüja inyakba ajanga anguba takoktem asütsü.

Aji oda, Dr.Clark o Mary Mead nati sayuba putu sülen ABAM-i anepaluba putu aser ano iba sülen Ao Sendeni Literature Board shimer anepaluba putu ta Ao kakatkeno renlokba nung putu asem süir tang Ao Riju kümtetba ya putu pezübuba asütsü. Joko, tanü putu yabo computer aser digital putu ta dang masü saka Artificial Intelligent (AI) putu kumogo. Ibai asenok asoshi temoatsü putu ka lir, kechiyong yashi tashi asenoki computer ajanga meinyaktetba aser merajemba mapatem ajak AI ajangabo inyaktettsü.

AI ya nisungi nisung mesükba nung yangluba tango aser tanüla maliba mapa inyaker ka lir. Ajisüaka, AI ji nisung dang nungibo techiraba aser tashi tuluba. Aji oda, AI-i nisung dang nüngdak asüngdangtsü masü saka nisungiang AI dang asüngdangtsü aser temetnüba ajak AI-iang langzütsü. Kasaji, tanü nisungtemi inyakba mapa aika AI-temi dang inyaktsü. Iba tasenba putu nung AI inyakyim ya kodang bilemdangdir, Ao Riju ki takdang tuluba nung AI Cell ta zülua angur. Joko, AI-i dang Ao oshi zülumen medemtsütsü aser AI nem asenoki Ao ojang tetezü English nung aser English ojang tetezü Ao nung meyipdaktsütsü.

Aji dang masü AI nem Ao ken aser sangro mejemdaktsütsü aser AI dang asenok lipok otsütem asüngdangtsü. Aji oda, kaketriju nung zünga aotsüba lesson-tema AI nem dang renemdaktsütsüsa mapang arutsü. Itemji tesüngmangtsüka saka asangsang nung asenoki asüng Ao Riju nung ataloka angutsü. Itemji mapa küma inyaktsü asoshi Ao lanurtem rongnung Computer Science azünger AI nung Software engineer-tem nüngdaktsü. Iba mapaji tenzüksü atema AI dang asenok English nungi Ao oshi nung meyipzüksü Laishiba indang sayua tenzüksü akok. Joko, maparen ajak nung AI madenbo tangar memeneptsüba putu mapang ka tenzüksü. Ibaji meteta asenok Ao Riju ketdangsertem rongnung Ao oshi ashir dang masü saka Aor lanurtem rongnung AI inyakyim metetba software engineer-tema karbo shimoka amshitsübaji kanga tenügdaktsü asütsü.

Atangji, item ajakji angati nübo agibo meinyaktettsüa akok saka ano taa tulu agüjaa meyutettsü, anungji tetsüngda nung tamakok mengui Ao Riju mapatem putu yimya den sütepa inyaka otettsüsa lenirtemi kongsa Ao Riju ya registration agitsü nüngdaka ali, itemji awajema inyaka aotsü imlar.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tanur 45,000 nem Khristmas sempet agütsü



Syria nung Aid to the Church in Need (ACN)-i tanur kar nem sempet agütsüba sülen tangokba noksa nung angur.

December 28, 2023: Khristmas mapang nung Khristan melungtet telok kati nun tem den yarisema Syria aser Lebanon na nung tanur meyirjang aika nem Khristmas sempet lema agütsü.

Khristan melungtet telok Aid to the Church in Need (ACN)-i Sisters of St Joseph of Lyons aser Congregation of Jesus & Mary den senteper Syria nung tanur 35,000 aser Lebanon nung tanur 10,000 nem Khristmas sempet lema agütsü.

Parnokisa tanurtem nem süoshi talem lema agütsüogo.

Lebanon nung aliba Sisters of St Joseph of Lyons nungi Sister Raymonda Saada-i, "Onoki teyari nungdakba kibongtem, talisa tanurtem yariner. Tilateri dang

süaka asenoki Tsüngrem asen den aliba 'Emmanuel' kulisüa tangar nem tepela aser teimla agütsütsü akok," ta ashi.

Syria aser Lebanon na nung kibong aika chiyungtsü agi kanga anünger, anungji sempet mashie agütsüba ajanga-a parnok nem tepela agütsütettsü, ta lai ashi.

ACN-i 2015 küm nungi tenzüka Syria nung aser 2021 küm nungi Lebanon nung iba project yarisema rara ajanga takoksa angurtem yaria arudar. Sister Saada-i, "Iba project ya Tsüngremi melungba project ka ta onoki meteta liasü, iba denji külemi onok den yaritepner temelunger aika liasü," ta ashi.

Syria nung aliba Congregation of Jesus & Mary nungi Sister Annie Demerjian-i, "Yangi aliba

kibongtem aikati süoshi tasen aginer. Tanü-asüng Syria nungbo longpant ka den tola ka aser tsüngsem alitsü atema ita ana nung aazükba sen nungdaker," ta ashi. "Tan Khristmas nung sempet agizükertem rongnung Syria artsülen aliba Lebanese yim nungi amitsür ana- Farha aser Nidaa na densema liasü. Tenaprongla kinüngbutem 2016 küm Daesh (ISIS) kiralongrartemi amakdang asü," ta lai metetdaksü.

Sister Saada-i, "Kü sarasadem nung teti ni ACN ajanga tajanzük angurtem bilemteter. Nenok (ACN) medenibo onoki kecha meinyaktettsü. Iba project nungita yariba atema nenok dang pelar," ta lemsatsep.

Uganda nung Khristan sayutsüngir ana pua jail nung puok

Nairobi, December 28 (Agencies): Anüdoklen Uganda nung Khristmas atongtsü mapang anasa Muslim nungertemi Khristan sayutsüngir ana dak azükba sülen jail nung puok.

Sayutsüngir ana jagi lenmang nung sayutsüngia jajaba mapang nung Muslim nungertem jagi tenati Tsüngrem mezüngmeshiogo, ta tai tonglokja azükba sülen police nem agütsü.

Soroti yimti nung anogo asemnü evangelistic sentong tatembangbuba anogo nung police-i Joseph Omadi aser Isaac Napakol na apu, ta pastor kati metetdaksü.

Sayutsüngir ana jagi lenmang nung minute 30 shi sayutsüngiba mapang nung Muslim nungertem telok tuluka iba tesem jagi aru, ta Pastor Robert Omodingi-i metetdaksü.

"Parnok Tsüngrem O angatsü atema aru südi ta onokibo bilema liasü, ajisüaka parnoki tena dak azük. Mapang tatsüka tsüngda police arua tena puer ao," ta Pastor Omodingi-i ashi. Police-i Uganda nung Arrla

122 kübok tena anema ken o benokba sülen magistrate court kati tena jail nung puok, ta pastor-i ashi.

Sayutsüngir ana jagi sayutsüngiba mapang nung Muslim nungertem temeshi kakat 'Quran'-a amshiba ajanga tenati Muslim nungertem temelung yirutsüogo, ta tena nem tai tonglokja liasü.

Pastor Omodingi-i, district lenir Sheikh Ramadhan Ibwaakit-i Imam ka yoka sayutsüngir ana dangji Quran mamshitsü metetdakja liasü, ta ashi.

District leniri ketdangertem dang, "Muslim nungertem ama onoki kafir [mamangertem] dang Quran aser Islamic kakattem mamshitsü tekümdangtsü metetdakja liasü, ajisüaka tenati tashi manga. Soroti yimti lenmang nung Muslim nungertem dang sayutsüngiba mapang tenati Quran nungi Lai tekongtem amshi. Ibaji onok yimsü nung tagizükettsüla masü," ta metetdaksü. Khristan sayutsüngir ana anema January 10, 2024 nü ken o angadangtsü.

Pastor-i, "Taruba hopta asem

tashi sayutsüngir anaji jail nung timtemtsü," ta ashi.

Soroti nung aliba Arogotemi sayutsüngir ana atema lumia sarasademtsüdar.

Pastor-isa, "Muslim nungertemi moapu nung crusades agiba mapang nung parnoki Laishiba amshiba onoki nguogo. Muslim nungertemia Laishiba amshir, ajisüaka Arogoi kodanga parnok anema ken o mebenoker," ta metetdaksü.

Uganda linük temzüng kübok Arrla 122 ya Tsüngrem mezüngmeshiba ozüng ka lir. Tanga yimsü amangertem melung yirutsütsüsa züluba mesüra jembibaji ozüng alema lir.

Uganda linük temzüng aser tanga ozüngtem ajanga linük nung ajak nem yimsü temeden agütsür, pei yimsü tangar den lemsateptsü aser tangar ka yimsü meyipdaksütsü atema temeden agüja lir, ajisüaka iba temeden ya atangji nungbo mebenshiteter.

Uganda nung nütsüng shilem 12 shi dang Muslim nungertem lir, aser parnok teimbaka linük anüdoklen tsütsü lir.

ANOGO ABEN TSÜNGREM DEN

HAU-NUNGA

Jokorla nenok 'Hau' süra 'Hau' musura 'Nunga' süra 'Nunga' ta sudakjang. Aser kechisa item dakji tali jembidir, tamajungba nungi adoker. Mathi 5:37.


Meimchir taküm nung o shitak mejimbira aika ratar aser asüngtangtepatoker. Tesem ka nung A for Boy ta zülur angu, tai o sür nung kanga jangja a renemer ayu ta asüngdangtepa liasü.

Tanü asen lima asen lokti aser asen taküm kodang shitak- Hau mesura nunga ta asüba tejangja meshitetra tzü aoba na nung ayong mesüka lir. Nisungtem mangmangtepa atar. Kechi mapa nung sudir suaka aseni Hau, Nunga ta bendangtetba nungji tebur junga yuteter. Saka tai dang shitak jar shitak dang tai ajaba jagi tejashitep, tsükchitep, aser ken o aika asen atep nung mesüngjemteti lir. Tanü lai o nung ashiba ama Hau süra Hau, Nunga süra Nunga ta shitetba jagi tebur tajung atokdaksür. Paul-i Timothy shiti nung ashiba ama ochi oji temi amshia Tsüngrem tsüngdang agizükettsüsa ne sasa bendanga agüjang.

SARASADEM:

Kibuba ni ochi o benshiteter taküm asütsü nai ni yariangma Amen.

Bethlehem nung Khristmas thinenba atema Khristan lenir kati Hamas aitsü



December 28, 2023: Taküm Bethlehem nung Khristmas benjung thinenba atema Khristan lenir kati Hamas telok aitsüogo.

Congress of Christian Leaders nung Tir, Rev. Johnnie Moore-i, Bethlehem nung Khristmas tesangwa nokdangbaji Israel-i masü saka Hamas ajanga lir, ta metetdaksü.

"Hamas teloki alima nung Khristan billion 2 atema Temeshi Lima nung Khristmas nokdang. Yisu ya yimjung chuba lir. Hamas-i yimjung sempar," ta Moore-i ashi.

Rev. Moore ya U.S. Commission on International Religious Freedom (USCIRF) nunga Commissioner lir.

Moore-i, "Ramallah aser Bethlehem na nung Palestine nungertem Bethlehem nung Yimjung Chuba, Yisu Khrista osang sangdongtsü atema benjung tulutiba ayongzük nungbo kanga junger süla, ajisüaka parnoki Hamas pusema yimsü nung

yimtenren aitdaksü," ta ashi. Moore-isa Yirusalem nung Khristmas longsoa amongba den medemdanga Yisu asoba yimti, Bethlehem nungbo Khristmas junga mamongba metetdaksü.

"Khristmas jangratema amongtsü atema Yirusalem-i aotsü asoshi mila ka dang jajatsü. Benjung mapang Yirusalembo taküm lir, ibaji Israel ajanga lir," ta pai ashi. "Yirusalem ya Yihuda nungertem, Khrisitem aser Muslim nungertem külemi tesünep nung tepela aser tejashi ajak lemsatepa litetba yimti lir," ta pai ashi.

Bethlehem ya West Bank kübok lir. Tang Israel aser Gaza na tsüngda raraba ajanga takümbo Bethlehem nung Khristmas benjungmong thinenba liasü.

Küm shia Khristmas mapang nung alima tesem balala nungi Khristan meyirjang aikati Bethlehem semdangert; 2019 küm nunga Khristmas mapang nung nisung 150,000 dak temai Bethlehem yimti semdanga liasü.

AO OSHI ANGAZÜKDAK:
TANÜ ANGAZÜKTSÜBA OJANG



Shimtok

(v) tajung nungi tamajung agiteta endokba (exclude)

* Sepai aitsü purtem rongnung nisung aika shimtok.

Shimeka

(n) kibur küma mekabanga ayuba (encircle)

* Kiburi arem nung süngjangdong ajak shimekaa ayu.

OLONG PAITEP # 6654

	1	2		3	4	5
6					7	
			8	9		
		10				
11						
			12			
13	14		15			16
17					18	

TIPIEN

- 1. Inyaker ajangtelba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Taşola - (5)
- 11. S _ _ _ _ - (4)
- 13. Yagi ajak ashioxtür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. _ _ _ hi - (3)
- 16. Akümüli nungi pilar - (3)

OLONG PAITEP # 6653 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden, 3. Kioxtsü,
- 5. Lenti, 7. Tajangzük,
- 11. teronem, 12. Sempa,
- 13. Jahaz.



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Kaket riju 25 nem NOC agütsüba bushisüngdangtsü

Imphal, Luchii/December 28 (Agencies): Central Board of Secondary Education, New Delhi (CBSE) nung züngoksemtü atema tashi maliba nisung/ketdangsurtemi No Objection Certificates (NOCs) agütsüba ken o bushisüngdangtsü atema Manipur sorkari züngsem asem agi kümtetba Inquiry Committee ka tentetsüogo.

Ken o ya Manipur nung kaket riju 25 dak sendaka lir, shirnok tawa affiliate asü aser mapang tatsüka lir CBSE-i de-affiliate sütsü.

Committee nung Director, Education, school, Manipur L

Nandakumar Singh mendenbuba asütsü aser iba committee yagi parnoki bushitetba osang state sorkar nem January 5 nü tashi nungbo agütsütsü.

Iba osang ya Government of Manipur, Joint Secretary of Education(S), Anjali Chongtham-i agüja liasü.

Inquiry Committee tinyaktsütem rongnung, inyakyim sülen manidaki NOC agütsüba nisung/ketdangsurtem bushitsü, NOC nung signatures kangshia südaksü mesüdaksü, aibelena aliba ketdangsurtem anema jenjang agitsü asoshi tetuyuba agütsütsü aser kuli

kaket amala taila amshiba kuli ngutetra temzüng ozüing kübok jenjang tapet agitsü asoshi FIR benoktsü densema lir.

Temetetsü kaji CBSE-i tawa Manipur kübok Churachandpur aser Kangpokpi district nung kaket riju 25 affiliate sür aliba agintsüogo.

Item kaket rijutemi benokba NOC ya State sorkar kübok iba tashi amshitsü atema nonglokja aliba ketdangsurtemi agütsüba masü ta shia item rijutem züngoksema aliba agintsüogo. Manipur sorkari item rijutem agintsü asoshi mepeshiba sülen CBSE-i iba jenjang agia liasü.

Tripura: Yimden yimsüsür tejen Surajit Datta süogo

Agartala, Luchii/December 28 (Agencies): Yimden yimsüsür tejen aser BJP lenir Surajit Datta, shiba MLA ama tenetben tashi inyakogo, pa Tripura yimtiba Agartala nung süogo.

Yimden yimsüsür tejen ya Ramnagar Assembly Constituency nungi tenetben tashi shima liasü.

Surajit Datta shiba term tenet tashi Member of the Legislative Assembly liasü, pa Bodhbar aonung süogo.

Surajit Datta ya BJP MLA ka liasü aser pa temang nungi timtem aika liasü. Pa tezüing nung timtem adokba sülen iba ajanga high blood sugar aser pressure agi tonga tashidak kanga tebenja kümdaksü. Tezüing nung timtem aliba



ajanga taoba küm ishika pa dialysis agia liasü.

Anogo ana tejakdang pa temang tamajungba akümba sülen Datta ya mezüingbo Agartala nung mozüki kati anir ao. Ajisüaka temang kanga mejungi akümba ajanga pa AMRI Kolkata-i anir aotsü atema Bodhbarnü tetuyuba agüja liasü.

Ajisüaka tia maka pa Bodhbar aonung 11:30 nung süatok.

Pa Agartala nung mozükidang amungba mapang Chief Minister Dr Manik Saha, Union Minister Pratima Bhowmik, aser Opposition lenir Animesh Debbarma nungeri semdanga liasü.

Manipur: Security force temi telungpurtem mintok

Imphal, Luchii/December 28 (Agencies): Bodhbar aonung Imphal East, Manipur nung Leitankopki yimtsüing telungpurtemi amakba sülen iba yimtsüing nung aliba nüburtem kanga aoksatepogo.

Iba yimtsüing amakba osang angazükba sülen Border Security Forces (BSF) aser Assam Rifles (AR) na longjemer iba tesemi aritepa ao aser smoke bomb aser injang

khalokja telungpurtem mintoka liasü.

Osang ajanga ashiba agi, Chingyang Mathak, Gangpiyang, Sadu Longa Koireng, Tusam, aser Tengkonphai nung telungpurtem ya tenem nung amenoka aliba maongka agia aonung 7 ako shi nung iba yimtsüing maka liasü.

Injang khaloktsüba sülen iba yimtsüing nung alirtem

tsübutepa jenshi tenzük.

Yimdak lir kati ashiba agi, parnoki Imphal East aser Kangpokpi indang inter-district buffer zone nung amenoka aliba BSF aser AR indang Commanding Officer tem nem par yimtsüing ajungbena amakba indang osang agüja liasü.

Iba yimtsüing kechiba amak aji jangjatsü atema bushisüngdang tenzükogo.



December 27 nü Assam kübok Cachar district nung Viksit Bharat Sankalp Yatra sentong ka ayongzuka agiba mapang tangokba noksa nung angur.

Kim Jong Un-i mitkar dang tekeraba nung raratsü renemshitsü ashi



Seoul, Luchii/December 28 (Agencies): North Korea lenir Kim Jong Un-i nuclear sentong densema mitkartem dang tekeraba nung raratsü renemshitsü ashi aser ibaji United States-i rara mesüa mera agiba asoshi lir ta ashir.

North Korea nung tang yimsü asüba Workers' Party indang senden tang temendak nung jembidang, People's Army nem mapa nungloksü aser munitions industry, nuclear weapons aser civil defence sector tem dang tekeraba nung raratsü asoshi renemshitsü ashi, ta Korean Central News Agency (KCNA) ajanga Brehostibarnü ashi.

KCNA-isa ashiba agi, US-i North anema inyakba ajanga Korean peninsula nung mitkar tsütsü tensa kanga mejungi kumogo ta Kim-i ashi.

Ajisüaka state news agency

ajanga terenemshiba indang tejangja mashi.

Taküm Pyongyang-i otsü yanglua nok-nü tendangba mapang South Korea, Japan aser US yimten aser defence tsütsü tesendaktep tali akangshiogo aser North Korea-i missile tendangba 'real-time data' nung lemsatepsü asoshi tawa ang system ka amenokogo.

Ita tetenzüklen US nuclear-powered submarine ka South Korea nung rongnendak yimti Busan tonga aruogo aser Washington-i Seoul aser Tokyo den drills agidang long-range bombers yoka liasü.

Kasa mapang Pyongyang-ia military spy satellite mezüngbuba takok ngua anüglaki yok, solid-fuelled Hwasong-18 tendang aser linük indang constitution nung nuclear power jenjang alangteta liasü.

Hwasong-18 ya par asoshi most advanced intercontinental ballistic missile (ICBM) lir.

Hopta tetenzüklen Kim-i 2023 ya temelenshi tulu aliba küm ka ta ashi aser yangji Pyongyang-i tenük lapoktsüsa takok balala angu ta pai ashi.

Taoba hopta United Nations atomic agency ajanga North Korea indang Yongbyon nuclear facility nung reactor tanabuba amshir amai ajiteter aser ibaji kanga tesasatsü lir, ta shia liasü.

Kim-i iba o ashiba ajanga North Korea nung nok-nü tendangba mesüra mitkartem tashi itshiba maparen tanemba akumtsü teimla monguteter.

Pyongyang indang nuclear programme anentsü aser iba melena tenokdangba/temerenshi agientsü atema 2019 küm US nung tir inyaka alisang Donald Trump den senden aika mena jembishinüaka takok mongutet. North Korea-i 2006 küm nuclear nok-nü mezüngbuba tendangba sülen UN Security Council ajanga tenokdangba/temerenshi agüja lir.

North Korea ya Moscow den tesendaktep tajungba yanglua arur aser Kim-i party ketdangsürtem dang Pyongyang-i "anti-imperialist independent" linüktem den tesendaktep ulushitsü ta ashi.

Kim-i September ita linük alemer aodang Russian Tir Vladimir Putin den ajurutepa liasü. Ukraine den raraba nung amshitsü asoshi Pyongyang-i Moscow nem mitkar indang hadir agütsür aser iba melena Russia-i technology balala lemsatsü akok ta alimai temulung melemi lia tena ajurutepa liasü.

Israel-i Hezbollah aser Lebanon dang tekumdangtsü ashi

Tel Aviv, Luchii/December 28 (Agencies): Hezbollah-i amakba manenra parnok Lebanon den arütsü nungi agientsü asoshi Israel mitkari inyaksü, ta Israel minister kati ashi.

Iba telungpur teloki Israel north tsütsü injang khaloktsüba manenra mitkar tem tetsüing ajemoktsü, ta Benny Gantz-i ashi.

Tajunglen nungi tangatetep kati arutsü mapang tatemer ta pai ashi.

Kasa mapang Israel Defense Forces tekolakbai linük north tsütsü tali raratsü asoshi par sepaitem renema lir ta ashi.

"North nung aliba nüburtet metsüboi lidaktsütsü ya onok indang mapa mezüngbuba lir aser ibai mapang agitsü," ta Chief of the General Staff Lt Gen Herzi Halevi ashi.

Hamas-i October 7 nü Israel amakba sülen arütsü alema khatepba tali kumogo.

October 8 sülen Hezbollah teloki arütsü alema amakba Bodhbarnü timtiba liasü, ta security foces temi ashir.

Iba yongji Gaza nung rara ya region ajungalen prokshia aotsü akok ta nüburtet bilemer.

"Israel north tsütsü arütsü nung aliba tensa melenshitsü nungdaker," ta Gantz-i Bodhbar aonung osangbener dang ashi.

"Tajunglen nungi tangatetep kati arutsü atema anütetsü nung mapang tatemer. Israel north tsütsü alirtem dak injang khaloktsüba nokdangtsü asoshi Lebanese sorkari meinyakra, aser arütsü nungi Hezbollah mainshira, IDF-i inyaksü."

Hezbollah ya Shia Muslim nung telok ka lir, aser parnok ya anüolen linüktem, Israel, Gulf Arab linüktem aser Arab League ajanga kiralongraba lokti ka lir ta tenüing agüja lir.

Iran-i senotsü teyari agütsüba Hezbollah telok ya alima nung nok-nü tesashitiba bena aliba non-state military forces rongnung ka lir. 2006 küm Hezbollah teloki arütsü alema aita amakba mechi Hezbollah aser Israel tsüingta rara ka tenzüka liasü aser Israel sepaitemi southern Lebanon makdok.

Tan hopta arütsülen Hezbollah teloki rocket khaloktsüba aser weaponised drones amshiba tali lir, saka Israel war planes temi kanga kera telangzüba agüja khazüka yoker.

Liberia nung gas tanker apok, nisung jenti asü

Monrovia, Luchii/December 28 (Agencies): Northcentral Liberia nung totzü tanker ka apokba sülen nisung 40 shi asü, ta iba linük indang Chief Medical Officer Francis Kateh-i Bodhbarnü ashi.

Mongulbarnü menur totzü bena aliba gari ka linük yimtiba Monrovia nungi mile 80 shi pilar Totota, Lower Bong Country nung tsükoka apok aser iba mapang tereprangi arua alir aika asü aser yiru.

Asürtem ya tejangja meshiteter, kechiaser karbo mitsü kumogo, ta Kateh-i osangbener dang Bodhbarnü ashi saka paisa nisung 40 shi iba lendong nung sür alitsü südi ta ashi.

"Samar alirtem metettsü mechi ozü telok ki ka nungi kati aor," ta pai osangbener dang ashi. Police temi mezüngbo

nisung asürtem 15 liasü ta ashi aser iba lendong atalokba tesemi adenshidang ano nisung 30 shi yiru ta shia liasü.

Nisung aika iba mi agi arong, ta Liberia National Police nung deputy inspector-general Prince B Mulbah-i ashi.

Lenmang majungba aser apu ama infrastructure tashi maitba ajanga iba linük ya alima nung gari tsükokba nung tamajungtiba akumer aser European linüktem nung asür dang asemen agi timba asür ta United Nations ajanga ashir.

Mongulbarnü iba gari tsükokba sülen yangji alir kari gari nung bena aliba totzü agizüktsü merang dang tanker ya apok, ta police ketdangsür Malvin Sackor-i ashi. Police temi tang tashi asürtem aser yirur alirtem jangjatepba mapang lir, ta paisa ashi.

US-i Ukraine asoshi mitkar teyari tatembangba yoker

Washington, Luchii/December 28 (Agencies): Bodhbarnü US sorkari tang temelaba agüja aliba kübok Ukraine asoshi anünga aliba nok-nü tatembangba yoker, ta sangdong aser Russia-i amakba anema Kyiv-i raraba nung maneni yaritsü asoshi Congress nung telemtetba ka nungdaker.

"Ibai taküm asoshi tatembangba package lir aser yangi air-defense aser artillery munitions dena lir," ta State Department ajanga sangdong ka nung ashi. Ukraine yaritsü ken o nung Republican tem sadanger aliba Congress nung kera telemtetba agia asendenshir teyari agütsütsüla, ta ashi.

Tir Joe Biden-i Ukraine yaritsü ya tongtipangtiba mapa lir ta jembia arur aser US nok-nü aser senotsü teyari ya Russia-i amakba anema raratsü asoshi Ukraine atema tongtipang teyari lir.

Ajisüaka right-wing Republican temi teyari agütsüba anena atatsü meranger aser US south tsütsü arütsü nungi ozüing alema migrant tem aitba nokdangtsü asoshi mera tasen aser tesashi ka agitsü Democrats temi memulungra budget tasenba magizüktsü ya ashir.

Tatemsaba teyari ya sen million \$250 jenjang lir aser yangji "air-defense munitions, danga air-defense system components, high mobility artillery rocket systems atema injang, 155mm aser 105mm artillery ammunition, anti-armor munitions, aser ano injang rounds 15 million dak tema lir," ta State Department-i ashi.

Iba sangdong ya ajanga US-i anir linük 50 dak temai Ukraine yariba sayur.

"Ukraine par sasa tsükchir dang nungi kumzüka aser tarutsü jenjang wazüka ayutsü

asoshi Congress-i akok tashi tekeraba nung inyaksüla," ta sangdong ajanga ashi.

Kyiv nung Ukrainian presidential aide Andriy Yermak-i iba teyari pelashishia agizük.

"Teyari asoshi kanga pelar. Asenoki akoktsü," ta Yermak-i X (Twitter) nung zülutsü.

US mitkari teyari agütsütsü aliba ya tatembangba asütsü aser iba sülen agütsütsü temelaba mali, ta hopta ka tejakdang White House National Security Council odongtar John Kirby-i jangjangja shia liasü.

"Congress nung menonui inyaksü nungdaker," ta pai ashi.

Senate nung menden tera agi timba aliba Democrats temi Republican tem mesüzüktsü merang, saka terenlokba makai küm tatem sodi nguogo.

Congress ya January 8 nü tanaben senteptsü.

Tuli Marathon Race 2024

The 9th edition of Tuli Marathon Race, Cake Rally Race and Inter ward Volleyball Tournament Tuli & Tzüdikong Town will be held on 17th and 18th Jan. 2024 under the theme 'Clean and Healthier Tuli and Tzüdikong'.

Organised by the Administrator ADC Tuli in Collaboration with Tuli Town & Tzüdikong Adhoc Town Committee.

* LIST OF THE EVENTS *

- 1) Marathon Race - Both Male & Female
 - 2) Cake Rally Race - Both Male & Female
 - 3) Inter ward Volleyball Tournament
- All ward from Tuli Town & Tzüdikong Town.



Sd/
IMTINUNGKUM
Organising Committee

WFI suspend sütsüba mapang sorkari inyakyim shidak mebenok: Sanjay Singh



Sanjay Singh

Luchii/December 28, 2023 (Agencies): Tawa shimba Wrestling Federation of India tir Sanjay Singh-i Brehostibarnü sports ministry aitsüogo aser WFI suspend sütsüba mapang ministry-i inyakyim shidak benoka inyaksangshi masü, ta ashiba den parnok okadak ken o benoktsü ta shisem.

Sanjay Singh-i ashiba agi, WFI ya autonomous aser democratically elected lokti ka lir aser suspend mesütsü

tsünga iba lokti tentet tangatetba lemsateptsü asoshi maongka agütsütsü asü.

Sports Ministry-i WFI ya Deobarnü suspend sütsü. U-15 aser U-20 National Championships ayongzüka asayatsü sangdongba densema teletetba kar agiba mapang WFI temzüng ozüng alema inyaksangshiba atema suspend sütsü liasü.

"Onoki democratic yimya nung iba election kokogo.

Returning officer ya taoba J&K High Court chief justice liasü aser IOA aser UWW (United World Wrestling) nungia observer tem liasü. Election nung state unit 22-i shilem agi aser vote 47 nungi ni vote 40 ngua liasü," ta Sanjay-i ashi.

"Iba sülena onok suspend sütsüra onoki ajibo magizüktsü. Democratically-elect asüba lokti ka nem parnok tamendakdak lemsateptsü atema maongka magütsüba ya natural justice anema lir, koba India temzüng ozüng kübok ajak temeden lir," ta paisa shisem.

Taruba jenjang agitsü tebilemba aliba indang asüngdangba mapang pai, "WFI ya autonomous body ka aser sorkari inyakyim shidak benoka inyaksangshi masü. Onoki sorkar den sensak asemtsü aser sorkari onok suspend sütsür aliba maingra onoki okadak ken o benoktsü," ta ashi.

WFI-i parnok suspend sütsüba atema toktepar asünung pai Indian Olympic Association (IOA)-i Bodhbarnü tentetsüba ad-hoc committee magizüker ta ashi.

Sinclair-i Igor Stimac nem teyari agütsütsü

Panaji, Luchii/December 28 (Agencies): National coach Igor Stimac-i Asian Cup 2023 atema coaching staff nung taoba mapang England nung asayar Trevor Sinclair anisemtsü mepeshiba All India Football Federation (AIFF)-i mulunga agizükogo.

Taruba küm Qatar nung asaya aliba Asian Cup atema renemtsü asoshi India team atema mapang mali aser ibayongji Stimac-i, taoba mapang West Ham nung pa indang teammate dang ya teyari meshi asütsü ta angateter. Source-i ashiba agi, UEFA A qualified coach ya India team full back den inyaksü aser set-piece routine tem nung teyari agütsütsü.

"Trevor ya asayar kanga tajung ka liasü aser pai asaya

kanga junga angateta asaya. National team renemshitsü atema mapang kangabo mali aser pa aruba ajanga teyari tulu agütsütsü. Trevor-i full-back aser winger tem nem training agütsüba dang masü saka set-piece routine tem atema-a teyari agütsütsü," ta ketdangsur kati TOI dang ashi.

Arishi küm 50 tain coach ya Dubai nung amendaker aliba Go Pro Sports indang youth team tem head coach liasü. Pa Lancaster City FC (Northern Premier League) indang assistant manager aser Orange Soccer nung head coach liasü.

Sinclair asaya aliba mapang Premier League aser Championship nung asayaogo. Pa England national team nungi 12 ben asayaogo, kong 2002 küm Japan aser South Korea

nung Fifa World Cup nung asaya pezü nung shilem agiba densema lir.

Maneni pa England indang under-21 team nungia 14 ben asayaogo. Pa West Ham United (1998-2003; asaya 177) aser Manchester City (2003-2007; asaya 82) nungia asayaogo.

Küm 19 tashi professional ka ama asayaba sülen Sinclair ya temekok yiruba ajanga 2008 küm asaya nungi anena liasü.

Asia Cup nung India team January 13 nü Australia den mezüng asayatsü aser iba sülen Uzbekistan (Jan 18) aser Syria (Jan 23) na den asayatsü.

India team Doha nung December 30 nü adenshitsü, anungji parnok Asia Cup atema renemshitsü asoshi hopta anabo mapang angutsü.



4buba Lekie Mtei Youth Organsiation (LMYO) Sports Meet December 28 nü Lekie Village Local Ground nung tenzükogo. Asayamung lapokba sentong nung OSD to Dy. Chief Minister, Planning & Transformation, National Highway Azeu Namcyn Hau alakteta jaoker liasü.

India team Pakistan den Davis Cup masayatsü akok

Luchii/December 28, 2023 (Agencies): India team Pakistan nung ayongzüka asayatsü aliba Davis Cup play-off nung masayatsü akok. Local tennis association-i Brehostibarnü ashiba agi, team Pakistan-i aotsü atema sorkar nungi temelaba atadar.

1947 küm British yimsüsüba nungi nüjiso anguba sülen kidanger linük ana ya aiben raraogo aser iba ajanga saisapong daka kongshiogo.

AITA-i linük ana tsünga asaya ya tanga linük ka nung asayatsü atema mepeshiba International Tennis Federation tribunal-i magizükba sülen All India Tennis Association (AITA)-i sports ministry dang Pakistan-i aotsü atema temelaba meshia liasü.

"Onoki temelaba meshiba ministry-i tang tashi temelaba magütsü lir," ta AITA secretary-general Anil Dhupar-i ashi.

Pakistan Tennis Federation tir Salim Saifullah Khan-i ashiba agi, February 3 aser 4 nü asayatsü aliba World Group 1 atema India squad nung züngsem 17-i visa meshiogo.

"Onoki jenjang tapet agiogo. Parnok nem security aser tanendak tajungtiba

renemtsütsü. Yimden yimsüba aser saisapong ya memeyoktepdaktsüti," ta pai AFP dang ashi.

New Delhi nung 2006 küm Pakistan tennis team host süa asayaogo aser Indian Davis Cup team tatemsa 1964 küm Islamabad-i oa asaya liasü.

Local media sangdong balala ajanga ashiba agi, 2019 küm linük ana tsünga Pakistan nung asayatsü aliba Kazakhstan-i belener ao. Iba mapang AITA-i, linük ana tsünga mangatetep aliba ajanga iba temepeshiba agüja liasü ta ashi.

Linük ana anemtepa ajanga India aser Pakistan na tsünga joko küm aika asaya kecha masayai arudar.

Cricket asaya nung Pakistan aser India na asaya ya ajak dang tongtibangtiba ka lir, ajisüaka team ana tsünga küm ter dak tema bilateral series ka danga masayai arudar.

Taküm September ita-a India-i 50-over Asia Cup atema Pakistan-i aotsü memulungi liasü aser iba ajanga Sri Lanka nunga asaya kar asayatsüsa aküm.

Iba sülen Pakistan team Cricket World Cup atema India-i arua liasü.

Mitoma Asian Cup nung asayatsü masayatsü mejangja



Luchii/December 28, 2023 (Agencies): Japan nung nungtugu asayar Kaoru Mitoma tetsüng teloktep yiruba ajanga hopta trok tashi masayatetsüsa akümba sülen pa taruba ita Asian Cup nung asayatetsü masayatetsü mejangja.

Arishi küm 26 tain asayar ya taoba hopta Brighton pur Crystal Palace den goal 1-1 agütsü tembangba asaya nung yirua liasü. Kasa asaya nung Ivory Coast winger Simon Adingra-a hamstring yiru aser pa-a Africa Cup of Nations nung asayatetsü masayatetsü mejangja.

Qatar nung asayatsü aliba Asian Cup ya January 12 nü tenzüktsü aser AFCON ya January 13 nü Ivory Coast nung tenzüktsü.

Tena ya Brehostibarnü kidang Tottenham den asayatsü aliba asaya nung masayatetsüsa aküm Brighton

asayar 10 rongnung densema lir.

"Onok asaya 10 shi yirur lir, saka asayar anabo asaya tetenzük nungi masayatetsü," ta Brighton coach Roberto De Zerbi-i Bodhbarnü ashi.

"Masayatetsü pur rongnung Mitoma densema lir. Pa hopta trok shi masayatetsü. Adingra-a hopta pezü mesüra pongubo masayatetsü. Brehostibarnü Mitoma aser Adingra na masayatetsü.

Brighton pur Europa League nung asayaba ajanga yiruyipong tali bulur asütsü ta De Zerbi-i bilemer, ajisüaka Spurs boss Ange Postecoglou densema Premier League nung tanga manager temia kasa tia ajangshiba agizükogo.

"Iba season asayar aika yiruogo, kechiyong March, Pervis Estupinan, (Julio) Enciso aser Mitoma nung ya tetsü yiruba dang masü. Hopta shia asembenben asayaba ajanga asütsü südi," ta pai ashi.

"Ni asayar ajak medema lia asayaner saka Tottenham pura asayar tenet ti ka melei-i asaya aika asayaogo aser iba atema Postecoglou-i ashishiba mangashidang. Iba ya football asaya yimya aser aji agizüktsü nungdaker," ta Italy nung coach yagi ashi.

BILEMDANGANG
 "Taküm nung sempet tulutibaji tangari mamai bilemtetba lir."